

Do waren och dem kunige. diu märe nu geseit.
des im von gedanchen. swonden siniv leit.
wie herrenlichen Chriemhilt. da chome durch diu lant.
er begunde vaste gahen. da er die minneklichen vant.

Von vil maniger sprache. sah man vf den wegn.
vor Ezelen riten. vil manigen chönen degen.
kristen vnt heiden. vil manic witiu schar.
da si ir frowen funden. si foren vrolichen dar.

Von Ruzzen vnt von Chriechen. reit da vil manic man.
Polanen vnt Vlachen. den sah man ebene gan.
ir pferit vnt ros diu guten. da si mit chrestin riten.
swas si site habeten. der wart vil wenich iht vermiten.

Von dem lande v; Chyewen. reit och da manic man.
vnt die wilden Peseväre. da wart des vil getan.
mit den bogen schiesen. zen vogelen die da flogen.
ir pfile si vil fere. mit chraft vnz an die wende zogen.

Ein stat bi Tvonowe. lit in Osterlant.
diu ist geheizen Colme. da wart ir sit bechant.
vil manic site vrende. den si nie da vor gefach.
si enpfingen da genvege. den leide sit von ir geschach.

Vor Ezele dem richen. ein gesunde reit.
vro inhohem mvote. hobesch vnt och gemeit.
wol vier vnt zweinzsch forsten. rich unt her.
das si ir frowen sehen. da von negerten si niht mer.

Der herzoge Ramunch. vzer Vlachen lant.
mit sibenhundert mannen. chom er for si gerant.
sam die wilden voege. so sah man si varn.
do chome der forste Sibeche. mit vil herlichen scharn.

Hornboge der snelle. wol mit tusint man.
kerte vonne kunige. gein siner frowen dan.
vil lote wart geschallet. nach des landes siten.
von den Hunin magen. wart och da sere geriten.

Do chom von Tenemarche. der chvone Hawart.
unt Irinch der starche. vor valsche wol bewart.
vnt Irnfrit von Doringen. ein fuerste lobesam.
die enpfienge Chriemhilt. als es ir eren wol gesam.

Mit zwelf hundert mannen. die hetens inir schar.
och chom der herre Blödelin. mit tusint helden dar.
der Etzelen brooder. v; der Hunin lant.
der ilte mit den sinen. da er die kuniginne vant.

Do chom der kunic Ezele. vnt och herre Dietrich.
mit allen sinen degenen. da was vil lobelich.
manic ritter edele. biderb vnt gvot.
des wart der chviginne. ein teil gesenftet der mvot.

Do sprach von Bechelaren. der herre Rodeger.
frowe och wil enpfahen. hie der kunic her.
swen ich iw rate chvossen. daz sol sin getan.
iane mvgt ir niht geliche. gvosen alles kuniges man.

Do hyp man von dem möre. die kuniginne her.
Ezele der riche. enbeite och do niht mer.
er stont von sinem roffe. mit manigem chvonen man.
man sah in vroliche. gein Chriemhilde gen.

Zwen forsten riche. als vns daz ist geseit.
bi der frowen giengen. vnt habten ir div kleit.
do ir der kunic Ezele. hin begegene gie.
da si den forsten edele. mit chuffe gottlich enpfie.

Vf rihte si ir gebende. ir varwe wolgetan.
diu lohete ir vsem golde. da stvnt vil manic man.
die iahen daz frow Helche. niht schoner chunde sin.
da bi stvnt vil nahen. des wirtes broder Blödelin.

Den hiez si chuffen Kvedeger. der maregrave rich.
vnt den kunic Eibechen. da stvnt och her Dietrich.
der rechen chufte zwelfe. daz Ezelen wip.
do enpfie si sos mit grooze. vil maniges chonen rechen lip.

In der selben wile. vnt Ezele bi ir stvont.
do gebarten da die tomben. so noch die lote tvont.
vil manigen pvney; langen. sah man da geriten.
daz taten kristen degene. vnt och die heiden nach ir siten.

Wie rechte hurtteklichen. die Dietriches man.
die schefste liezen vliegen. mit tronzvonen dan.
vil hohe vber schilde. von guter ritter hant.
die si da gerne sahen. die wrden schiere bechant.

Da wart von schefste brechen. vil michel chrach vernomen.
do waren von dem lande. die rechen alle chomen.
vnt och des chuniges geste. vil manic edel man.
do gie der kunic riche. mit der kuniginne dan.

Si sahen bi in stende. ein vil herlich gezelt.
von hutten was erfollet. alunbe gar daz velt.
da si vnder solden rvowen. nach ir arebeit.
von helden wart gewiset. vil manic wätlichiv meit.

Mit Chriemhilde dannen. da si sit gefaz.
vf riche gesidele. der maregrave daz.
hete so geschaffen. daz man ez vant vil gvot.
do stvnt dem kunige Ezelen. harte hohe der mvot.

Was si ze samne redeten. daz ist mir vnbechant.
wan zwiffchen sinen handen. was ir wiziv hant.
si gefazen minnekliche. da Rodeger der degen.
den kunic niht lasen wolde. der frowen heinliche pflegen.

Do hiez man lan beliben. den buhort iber al.
mit eren wart verendet. da der groze schal.
do giengen zo den hutten. die Ezelen man.
man gab in herberge. vil witen allenthalben dan.


Den abent zo der nahte. si heten guot gemach.
vnz man den liechten morgen. aber schinen sach.
do was gefatelet Ezelen. vnt allen sinen man.
vil maniger churcewile. man im zen eren da began.

Der chunic ez lobeliche. die Hunin scaffen bat.
do riten si von Colme. ze Wiene zo der stat.
da was vil wol gesieret. vil maniger frowen lip.
si enpfiegen wol mit eren. des kunic Ezelen wip.

Mit vil grozem vollen. so was in bereit.
swaz si haben solden. vil manic helt gemeit.
entrosten riche satele. die Ezelen man.
sich hyp mit grozen eren. des kuniges hochgeciten an.

Sine mohten niht beliben. ze Wiene inder stat.
die niht geste waren. Rodeger die bat.
von der burege dannen. herbergen indaz lant.
ich wan man alle cite. bi frowen Chriemhilde vant.

Den herren Dietrichen. vnt anders manigen degn.
si heten sich der rowe. mit arebeite bewegn.
durch daz si den gesten. getrosten wol den muot.
der kunic mit sinen frivonden. hete churcewile guot.



Die hochgeite was gevallen. an einen pfintach.
do der kunic Ezele. bi Chriemhilde lach.
inder stat ze Wiene. si wän so manigen man.
bi ir ersten vriedel. nie zedienste gewan.

Si chvnte sich mit gabe. dem der si nie gesach.
vil maniger darvnder. zvo den gesten sprach.
wir wänden daz frov Chriemhilt. niht gvotes mohte han.
no ist hie michel wnder. von ir gabe getan.

Die hochgeit do werte. wol sibenzehn tage.
ob chunic ie deheiner. mit warheit oder nach sage.
deheine grozer gewinne. daz ist vns gar verdeit.
alle di da waren. die trogen iteniwe chleit.

Si wän in Niderlanden. da vor nie gesaz.
mit so manigem rechen. da von gelovbe ich daz.
was Sivrit rich des gvotes. daz er doch nie gewan.
so manigen rechen edelen. als si zen Hvinin mohte han.

Och gab ir nie deheiner. zvo sin selbes hochgeit.
so manigen richen mantel. lanch. tief. vnt wit.
noch so richer chleider. der si vil mohten han.
so si durch Chriemhilt. alle heten hie getan.

Die chunden unt die geste. die heten einen mvot.
daz si da niht sparten. deheinerflachte gvot.
sives ieman an si gerte. daz gaben si bereit.
des stont da vil der degene. von milte bloz ane chleit.

Wie si ze Rine säze. si gedaht an daz.
bi ir vil edelem manne. ir ovgen wrden naz.
si hetes vaste häle. deiz iemen chunde sehn.
ir was nach manigem leide. so vil der eren hie geschehen.

Swaz iemen tet mit milte. daz was gar ein wint.
vnz an Dietrichen. swaz Botelungef chint.
im gegeben hete. daz was gar verswant.
ovch tet da michel wnder. des milten Kudegeres hant.

Uer Ungerlande. der forste Blödelin.
der hiez da machen läre. vil manigiv leitfchrin.
von silber vnt von golde. daz wart gar hin gegeben.
man gefach nie kuniges degene. so rehte vroliche lebn.

Swemmel vnt Werbel. die Ezelen spileman.
ich wän ir ieslicher. zer hochgecite da gewan.
wol zetofint marchen. oder dannoch baz.
da div frowe Chriemhilt. bi Ezelen vnder chronen saz.

An dem ahtzehenden morgen. von Wiene si do riten.
da wart inritterfcheft. schilde vil versniten.
von spern die da forten. die rechen an der hant.
fvs chome der kunic Ezele. mit freuden inder Hunin lant.

Ze Heimburch der alten. si waren ober naht.
done chunde niemen wizen. wol des volches aht.
mit wie getaner chrefte. si riten durch daz lant.
hey was man schoner frowen. inir hejmwete vant.

Ze Miesenburch der richen. da schiften si sich an.
daz wasser wart verdeckhet. von roff vnt ovch von man.
sam ez erde wäre. swaz man sin oberfach.
die wege muede frowen. heten senfte vnt ovch gemach.

Ze samne was gebunden. manic schif vil goot.
daz in niht schaden chunde. die venden noch div flvot.
dar ober was gespannen. vil manic goot gezelt.
sam ob si noch heten. bediv lant vnt velt.

Ze Ezelen bürge. div märe chomen dan.
do freuten sich dar inne. wibe vnt man.
daz Helchen ingefinde. des e' div frowe pflach.
gelebte bi Chriemhilde. sit manigen frölichen tach.

Do stvnt inlieber warte. vil manic edel meit.
die von Helchen tode. heten manigiv leit.
siben chunige tohter. Chriemhilt noch da vant.
von den was wol gesieret. alles Ezelen lant.

Div innesfrowe Herrat. noch des gesundes pflac.
div Helchen swester tohter. an der vil tugende lac.
div gemahle Dietriches. einz richen chuniges chint.
div tohter Nantwines. div hete vil der eren sint.

Von der geste chunfte. so troste sich ir mvot.
ovch was dar zv bereitet. vil chreftechliches gvot.
wer chunde iv daz bescheiden. wie sit der kunic saz.
sine gelebten da zen Hunin. mit deheiner choniginne baz.

Do der wirt mit sine wibe. von dem stude reit.
wer ieslichiv wäre. daz wart zehant geseit.
der edeln kuniginne. si grvztes deste baz.
hey wie gewalteckliche. sit an Helchen stat gefaz.

Mit triwen hoher dienste. wart ir vil bechant.
do teilte div frowe Chriemhilt. golt vnt ovch gewant.
silber unt gesteine. swaz si des vber kin.
mit ir zen Hunin brachte. daz wofe gar zerteilet sin.

Ovch wrden ir mit dienste. slder vndertan.
al des chuniges mage. vnt alle sine man.
daz nie div frowe Helche. so gewaldechlich gebot.
so si no wofin dienen. vnz an den Chriemhilde tot.

Do stont mit solhen eren. der hof vnt ooch das lant.
das man da zallen ziten. die churzewile vant.
swar nach ieslichem. das herce truch den moot.
durch des kuniges liebe. vnt ooch die kvniginne gvot.

